



# Fasnacht 2025 Jungi Garde

## Wottsch e rächti Party gsee, dänzisch ab am ESC

Bim Song Contest vo dr Eurovision  
isch's scho syt langem Tradition,  
ass dr Schwyz, egal, wär für sii singt,  
dr Yzug in Final nit glingt.  
Jetzt ändlig, nach e baar Johrzähnte Flop,  
sinn mir, Nemo sei Dangg, wiider top.  
Doch dä Erfolg, dä bringt au Pflichte:  
Mir mien dr näggscht Final ussrichte.  
Veraastalte wurde dä Aaloss gärn  
Züri, Gänf oder au Bärn,  
aber d SRG entschaidet gly,  
dr ESC kunnt zue uns an Rhy.  
Das freut d Regierig, d Wirtschaft no meh,  
denn sy erhoffe sich volli Portemonnaie.  
Doch ainigi finde do dra kai Gfalle  
und klage, d Moral syyg am Verfalle,  
das koschti alles vyyl z vyyl Gäld,  
und s kääme us dr ganze Wält  
gschpässigi Lüt und au divärsi  
schreegi Vögel und Pervärsi;  
bi mängge wüss me nit mool gnau,  
ebs e Maa isch oder e Frau,  
und bim Danze, gänn sy no z bedängge,  
dien die unaaständig s Fuudi schwängge.  
Drum verlange sy, und das mit Erfolg,  
ass drüber abschtumme wird vom Volk.  
An dr Urne hänn die en Abfuehr bykoo,  
denn zwai Drittel vo de Bürger sage Jo.  
In Basel isch das Johr Party Time,  
alles fyirt, s blybt niemerts deheim,  
s herrscht Jubeltrubel Schaiawaia  
und vor de drey goot kain in d Haia.  
Me lacht, me singt und schwingt bim «Dänze» d Bai,  
e Stimmig wie an dr Fasnacht, nur im Mai,  
und s Motto isch s glyyche, denn au am ESC sottschi,  
aifach nur so sy, wie de wottschi.

**Buebe und Maitli ab em 7. Altersjohr könne in dr Pfyffer- und Drum- melschuel vo dr VKB gratis  
e halb Johr go schnubbere. Dr VKB-Käller isch an dr Clarastroos 57. Aamälde ka me sich unter:  
[www.vkb.ch](http://www.vkb.ch) oder über [jungi@vkb.ch](mailto:jungi@vkb.ch).**

**Am Frytig, 14. Meerz und Samschtig, 15. Meerz 2025 findet uf em Barfi die 1. Lektion statt.  
Fasnacht für alli zum Kennelehre und Usprobiere! [jetzt-fasnacht.ch](http://jetzt-fasnacht.ch)  
Und am Samschtig, 22. Meerz ab de 10.30 am Morge anverschiedene Ort im Glaibasel:  
#AuFürDi - Drumme und Pfyffe im Glaibasel. E Aggtion vo Glaibasler Clique.**